

Inzko se sastao sa Frattinijem



Visoki predstavnik i specijalni predstavnik EU Valentin Inzko danas se u Rimu sastao sa italijanskim ministrom vanjskih poslova Francom Frattinijem kako bi ga informisao o političkoj situaciji u Bosni i Hercegovini, napretku koji je zemlja postigla i prioritetima u predstojećem periodu.

Inzko je ministru Frattiniju kazao da podržava dijalog i kompromis, kakav je bio i 'prudski proces', ali je naglasio da se moraju postići značajniji rezultati, ako se želi da ti procesi imaju stvarno i opipljivo značenje. „Kada su u pitanju moji prioriteti, kao visokog predstavnika međunarodne zajednice, oni su usmjereni na tranziciju OHR-a u Ured specijalnog predstavnika Evropske unije, do čega može doći samo ispunjavanjem pet ciljeva i dva uslova koje je postavilo Vijeće za implementaciju mira.“ – izjavio je Inzko.

Na današnjem sastanku u Rimu, bilo je riječi i o nedavnoj zajedničkoj posjeti potpredsjednika SAD-a Josepha Bidena i visokog predstavnika EU za zajedničku vanjsku i bezbjednosnu politiku Javiera Solane Bosni i Hercegovini. „Biden i Solana su bosanskohercegovačkim liderima prenijeli jasnu poruku da i SAD i EU podržavaju evroatlantske integracije BiH, ali da su domaće vlasti te koje moraju ispuniti svoje zadatke, počevši od ciljeva i uslova PIC-a, te da negativna retorika i negiranje države, kao što su zaključci Narodne skupštine RS usvojeni 14. maja ove godine, moraju prestati.“ – rekao je Inzko.

Visoki predstavnik i specijalni predstavnik Evropske unije, Valentin Inzko, zahvalio je italijanskom ministru vanjskih

poslova, Francu Frattiniju, na kontinuiranom učešću Italije u snagama EUFOR-a.